

সূরা - ৯৬

রক্তপিণ্ড

(আল্-আলাক, :২)

মক্কায় অবতীর্ণ

আল্লাহ্‌র নাম নিয়ে, যিনি রহমান, রহীম।

- ১ তুমি পড়ো তোমার প্রভুর নামে যিনি সৃষ্টি করেছেন,—
- ২ সৃষ্টি করেছেন মানুষকে এক রক্তপিণ্ড থেকে।
- ৩ পড়ো! আর তোমার প্রভু মহাসম্মানিত—
- ৪ যিনি শিক্ষা দিয়েছেন কলমের সাহায্যে,
- ৫ শিক্ষা দিয়েছেন মানুষকে যা সে জানতেই না।
- ৬ বস্তুতঃ মানুষ নিশ্চয়ই সীমালংঘন করেই থাকে।
- ৭ কারণ সে নিজেকে স্বয়ংসমৃদ্ধ দেখে।
- ৮ নিশ্চয় তোমার প্রভুর কাছেই প্রত্যাবর্তন।
- ৯ তুমি কি তাকে দেখেছ যে বারণ করে—
- ১০ একজন বান্দাকে যখন সে নামায পড়ে?
- ১১ তুমি কি লক্ষ্য করেছ— সে সৎপথে রয়েছে কি না,
- ১২ অথবা ধর্মভীরুতা অবলম্বনের নির্দেশ দেয় কিনা?
- ১৩ তুমি কি দেখেছ— সে মিথ্যারোপ করেছে ও ফিরে যাচ্ছে কি না?
- ১৪ সে কি জানে না যে আল্লাহ্ অবশ্যই দেখতে পাচ্ছেন?
- ১৫ না, যদি সে না থামে তবে আমরা নিশ্চয় টেনে ধরব কপালের চুলের গোছা—
- ১৬ মিথ্যাচারী পাপাচারী চুলের গোছা!
- ১৭ তাহলে সে ডাকুক তার সাঙ্গোপাঙ্গদের,
- ১৮ আমরাও সঙ্গে সঙ্গে ডাকবো দুর্ধর্ষ বাহিনীকে।
- ১৯ না, তুমি তার আজ্ঞা পালন করো না, বরং তুমি সিজ্দা করো এবং নিকটবর্তী হও।